

অতি ক্ষুদ্র, ক্ষুদ্র ও মাঝারি উদ্যোক্তাদের পণ্যে বৈচিত্র্য আনতে হবে : শিল্পমন্ত্রী



ডিজিটাল প্ল্যাটফর্ম “এসএমই শপ বাংলাদেশ” এর উদ্বোধন অনুষ্ঠানে ভাষণদান করছেন মাননীয় শিল্পমন্ত্রী জনাব নূরুল মজিদ মাহমুদ হুমায়ূন, এমপি

বাংলাদেশ এসএমই ফোরামের আয়োজনে হাজার উদ্যোক্তার ডিজিটাল প্ল্যাটফর্ম “এসএমই শপ বাংলাদেশ” এর উদ্বোধন অনুষ্ঠানে প্রধান অতিথির ভাষণে মাননীয় শিল্পমন্ত্রী এ কথা বলেন। সরদার শামস আল মামুন (চাষী মামুন) এর সভাপতিত্বে মতিঝিলে বিসিক ভবনের সম্মেলনকক্ষে ২০ জানুয়ারি, ২০২১ অনুষ্ঠিত “এসএমই শপ বাংলাদেশ” অনুষ্ঠানে প্রধান অতিথি হিসেবে উপস্থিত ছিলেন মাননীয় শিল্পমন্ত্রী জনাব নূরুল মজিদ মাহমুদ হুমায়ূন, এমপি। বিশেষ অতিথি হিসেবে উপস্থিত ছিলেন বিসিক চেয়ারম্যান জনাব মোঃ মোশ্তাক হাসান, এনডিসি এবং ইকনমিক রিপোর্টার্স ফোরামের সাধারণ সম্পাদক জনাব এস এম রাশিদুল ইসলাম। এ সময় আরও উপস্থিত ছিলেন বিসিক পরিচালনা পর্ষদের সদস্যবৃন্দ।

প্রধান অতিথির ভাষণে মাননীয় শিল্পমন্ত্রী বলেন, অতি ক্ষুদ্র, ক্ষুদ্র ও মাঝারি উদ্যোক্তাদের পণ্যে বৈচিত্র্য আনতে হবে। ই-কমার্সের এই যুগে শিল্পখাতে বিপ্লব ঘটাতে অতি ক্ষুদ্র, ক্ষুদ্র ও মাঝারি উদ্যোক্তাদের নিত্য প্রয়োজনীয় পণ্য উৎপাদনের পাশাপাশি পণ্যের বৈচিত্র্য আনয়ন করে তা ডিজিটাল প্ল্যাটফর্মে অংশগ্রহণের মাধ্যমে গ্রাহকের কাছে পৌঁছে দিতে হবে। করোনা মহামারির সময় বড় বড় শিল্প কারখানা বন্ধ থাকলেও অতি ক্ষুদ্র, ক্ষুদ্র ও মাঝারি এবং প্রান্তিক উদ্যোক্তাদের উদ্যোগ থেমে থাকেনি বলেই দেশের অর্থনীতি এখনও সচল রয়েছে। তিনি বলেন, অতি ক্ষুদ্র, ক্ষুদ্র ও মাঝারি এবং প্রান্তিক উদ্যোক্তারা করোনাকালীন মাননীয় প্রধানমন্ত্রী ঘোষিত প্রণোদনা প্যাকেজ যাতে নির্বিঘ্নে পেতে পারে, সে ব্যবস্থা আমরা পর্যায়ক্রমে করেছি। কভিড-১৯ এর মাঝেও ক্ষুদ্র ও মাঝারি উদ্যোক্তাদের নিজেদের প্রচেষ্টায় এবং সরকারের

গৃহীত পদক্ষেপে অর্গনীতিতে প্রাণসঞ্চার হয়েছে। জেলা, উপজেলা থেকে গ্রাম পর্যায়ে অতি ক্ষুদ্র, ক্ষুদ্র ও মাঝারি উদ্যোক্তাদের উন্নয়নে আমাদের সরকার কাজ করে যাচ্ছে।

বিশেষ অতিথির বক্তব্যে বিসিক চেয়ারম্যান জনাব মোঃ মোশ্তাক হাসান এনডিসি বলেন কুটির, অতি ক্ষুদ্র, ক্ষুদ্র ও মাঝারি শিল্পের উন্নয়নে সরকার আমাদের যে ভিশন দিয়েছে, তা অর্জনে বিসিক এবং এসএমই উদ্যোক্তা ফোরামকে একত্রে কাজ করতে হবে। বিসিকের অন্যতম দায়িত্ব হচ্ছে বাংলাদেশ এসএমই ফোরামের উদ্যোক্তাদের সকল প্রকার সুযোগ-সুবিধা প্রদান করা।

সভাপতির বক্তব্যে সরদার শামস আল মামুন (চাষী মামুন) বলেন, সারাদেশে প্রান্তিক উদ্যোক্তাদের একটি প্রাতিষ্ঠানিক রূপ দিয়ে অর্থনীতির মূল শ্রোতধারায় নিয়ে আসাই বাংলাদেশ এসএমই ফোরামের প্রধান লক্ষ্য। কভিড-১৯ বিপর্যয়ের মধ্যেও নূতন এই ডিজিটাল প্ল্যাটফর্ম “এসএমই শপ বাংলাদেশ” এর মাধ্যমে নূতন নূতন উদ্যোক্তা তৈরিতে বাংলাদেশ এসএমই ফোরাম কাজ করে যাচ্ছে।

বিসিকের প্লটে নারী উদ্যোক্তারা অগ্রাধিকার পাবেন : শিল্পমন্ত্রী



“মুজিববর্ষে নারী উদ্যোক্তাদের অগ্রগতি ও চ্যালেঞ্জ” শীর্ষক সেমিনারে ভাষণদান করছেন মাননীয় শিল্পমন্ত্রী জনাব নূরুল মজিদ মাহমুদ হুমায়ূন, এমপি

আন্তর্জাতিক নারী দিবস উদযাপন উপলক্ষে ১৪ মার্চ, ২০২১ শেরেবাংলা নগর পর্যটন ভবন মিলনায়তনে এসএমই ফাউন্ডেশনের উদ্যোগে আয়োজিত “মুজিববর্ষে নারী উদ্যোক্তাদের অগ্রগতি ও চ্যালেঞ্জ” শীর্ষক সেমিনারে প্রধান অতিথির ভাষণে শিল্পমন্ত্রী জনাব নূরুল মজিদ মাহমুদ হুমায়ূন, এমপি বলেন, নারী উদ্যোক্তাদের অগ্রাধিকার ভিত্তিতে বিসিকের প্লট দেওয়া হবে এবং শিল্প মন্ত্রণালয়ের আওতাধীন বিসিক ও এসএমই ফাউন্ডেশনের উদ্যোগে নারী উদ্যোক্তাদের উৎপাদিত পণ্যের বাজারজাতকরণের ব্যবস্থা করা হবে।